

YOĀM TE' KUXA MĀM KA'OK XOP PU KAX'ĀMI' I

Hām'āktux te tikmū'ūn hīnnāhā'

1 ¹Ūgmū'āte xa ka'āmi', nūy xa Topak-tok Yeyox Kunnix 'āktux, ha Topa yōg Hām'āktux putuk. Hōmā hāmyāxatamuk xohixnāg 'ihā', 'ap xip'ah hām xexka', xix pexkox, pa nōm Hām'āktux xip tap, yā Topak-tok, hak mū'āte' xupak, xi' pēnāhā', xik mū'āte 'ūgyīm hā' xupit, ha nōm Hām'āktux yā Topak-tok, tu' xohix hīnnāhā'. ²Tu ta tu' xip hām tu, hak mū'āte' pēnāhā', huk mū'āte nōm hām'āktux 'āktux putup, yā' hi xe'ēgnāg, tu' hi kux putup 'ohnāg, tu yūmūg Tak Topa mūtik ti ka'ok, ha yūmū'ā tu' mūg, ³tu xa hām'āktux, nūy xa hāmyūmmūgā', yāk mū'āte' pēnāhā', tu' xupak, tu xa' xuktux, xayīk mūg kuxa mūtik yā 'ākuxap-xet. Kaxīy yūmūg kuxap-xet yūmūg Tak Topa kuxa mūtik, xik-tok Yeyox Kunnix kuxa mūtik. ⁴Ūgmū'āte tappet mīy, nūy 'ākuxa hittupmā', ha mōktu yā hittup xexka'.

Tu Topa te hāptupmāhā 'āktux

⁵Kunnix tek mū'ā hām'āktux, hak mū'āte xa' xuktux, hu: Māyōn te hāptupmāhā', tu 'āmnīy koxtap nōā', hā kaxīy Topa yā max xe'ēgnāg, tu hāpxopmā kummuk 'ohnāg. ⁶Tikmū'ūn te: “Ūgkuxap-xet Topa kuxa mūtik,” kaxīy, tu hāpxopmā kummuk pax, puxix tu mō'āmā', tu yā' koit. ⁷Tikmū'ūn te hāpkumep hāptup 'ihā, puxix putat pēnā max, ha' nōy xop xohix te' yōg hāpxopmā'ax pēnāhā'. Hā kaxīy yūmū'āte hāmyok mīy, Topa putuk yūmū'āte hāmyok mīy, kopxix yūmūg kuxap-xet, ha Topak-tok Yeyox Kunnix yūmūg pupi' xok tap, tu yāy hep 'āta nū'nāhā', nūy yūmūg kuxa tupmā, ū yūmūg kuxa tu max.

⁸Hu: “A 'āte hāpkummuk 'ūm mīy'ah,” kaxīy, kopxix yā' koit, 'ap hāpxe'le 'āktux'ah. ⁹Pa yūmū'āte yāy hāpkummuk mīy'ax 'āktux, xix Topa pu' xuktux, puxix Topa' mīy'ax kummuk xaxogā', pu tu kux, Topa te hām'āktux xex hah, tu hāmyok mīy, nūy yūmūg kuxa kummuk tupmā', 'ū kuxa tu max. ¹⁰Yūmū'āte: “Yāk kuxa max. 'Āte hāpxopmā kummuk 'ohnāg,” kaxīy, kopxix yā' koit, yā Topa te' koit 'āktux, tu Topa pu yūmūg yīpkox 'ohnāg.

Kunnix te yûmûg mōgnîynâm

2 ¹Ûgkutok xop, 'âte nû mîy tappet, xayîy 'âxop hâpkummuk mîy hok. Yûmûg 'ûm te hâpkummuk mîy, puxix Yeyox Kunnix te hâmyok mîy pax, tu yûmûg Tak Topa pu hãm'âktux, yûmûg pupi hãm'âktux, ²ha Topa te yûmû yōg hâpkummuk mîy'ax xaxogâhâ', yâ Kunnix xok yûmûg pupi', nûy hâpkummuk mîy'ax xaxogâ', pu tu kux. Ya' hep xop xohix yōg hâpkummuk mîy'ax xaxogâhâ kamah.

³Topa yōg xat'ax pu yûmûg yîpkox pi', kopxix yûmûg Topa yûmmûg, tuk kuxa mām. Yâ Topa yûmmûg xe'e!. ⁴Tikmû'ûn te: "Âte Topa yûmmûg," kaxîy, pa' yōg xat'ax pu' yîpkox hok, puxix yâ' koit, tu hâpkohe mîy. ⁵Tikmû'ûn 'ûm te Topa yōg hãm'âktux pu' yîpkox pi', puxix Topa mō'yây xe'ëgnâg, hâ kaxîy yûmûg kuxap-xet 'ûkuxa mûtik. ⁶Tikmû'ûn te: "Ûgkuxap-xet Topa kuxa mûtik," kaxîy, pûyâ mōg, nûy hâpxopmâ max, nûy Yeyox Kunnix yōg hâpxopmâ'ax tat.

Tu' xat'ax tup 'âktux

⁷Ûkxape xop: 'Ûxat'ax hittap 'âte xa kax'âmi!. Yâ hōmâ tikmû'ûn te xa' xat'ax 'âktux, tu xa hãm'âktux hãmâxap. ⁸Pa kama' tup 'ûxat'ax. Yâ Kunnix te' yûmmûgahâ', 'îhâ tu hâpxopmâ max. Yâ' xohix te' pênâhâ', tu' hittup. Yâ 'amnîy tox kux putuk. Kunnix nûn, tu hâpxopmâ max, tu yâ hâptup koa putuk. Yâ mâyōn xupep, tu hãm xexka xohix tupmâhâ', ha kaxîy Kunnix nûn, tu hãmmax yûmmûgahâ', tu hãmmaxnâhâ', ha mōktu 'âxop kama te hâpxopmâ max.

⁹Tikmû'ûn te: "Âte hâpxopmâ max," kaxîy. Yây xapep-tupnōg, puxix yâ hitop tu hâpxopmâhâ', tu tikmû'ûn nōy putuk, nōm te 'amnîy koxtap hâ hâpkumep, tu hâmpênâ 'ohnâg, xix hâmyûmmûg 'ohnâg, tu yâ yây mō'âmâ'. ¹⁰Tikmû'ûn te xapep-tup pax, puxix hâmyûmmûg, tu' nōy mō'nîynâm, puyîy hâpxopmâ max, tu' kummugâ 'ohnâg. Tu tikmû'ûn nōy putuk, nōm te hâptup 'îhâ hâpkumep. Tu hâmpênâ max, nûy nōy mōgâ max. ¹¹Tikmû'ûn te' xapep-tup nōg, puxix tu tikmû'ûn nōy putuk, nōm te yâyaxok hâpkoxtap kopah. Tu hâmpênâ 'ohnâg, tu tik pa hok putuk, tu hâmyûmmûg 'ohnâg.

¹²Ûgkutok xop: 'Âte xa kax'âmi!, hu: Yâ Kunnix te 'ōg hâpkummuk mîy'ax xaxogâhâ', pu tu kux. ¹³Âtak mûnōm xop: 'Âte xa kax'âmi!, 'âxop te yûmûg xuxyâ yûmmûg hah, ha' xiptap, 'îhâ Topa te hãm xexka mîy, ha 'âxop te nōm yûmmûg. 'Âtuk tup xop: 'Âte xa kax'âmi!, 'âxop te hâpkummugâ'ax kuxyâhâ.

¹⁴Ûgkutok xop: 'Âte xa kax'âmi!, 'âxop te yûmûg Tak Topa yûmmûg hah, 'Âtak mûnōm xop: 'Âte xa kax'âmi!, 'âxop te yûmûg xuxyâ yûmmûg hah, ha' xip tap, 'îhâ Topa te hãm xexka mîy. 'Âtuk tup xop: 'Âte xa kax'âmi!, 'âxop ka'ok hah. Topa yōg hãm'âktux te 'âkopa' xip, ha 'âxop te hâpkummugâ'ax kuxyâhâ'.

¹⁵Topa hâ' puknōg xop tep-tup nōg, yîy nōm pu 'ayîpkox hok, xi' yōg hâpxop putup hok. 'Âxop te 'ânōy yōg hâpxop putup xûy, hu ta yûmûg Tak Topap-tup hok. ¹⁶Topa hâ' puknōg xop te hâpxopmâ kummuk, yâ' yōg hâpxopmâ'ax xohix te: yây yōg putup'ax kummuk mîy, xi' nōy yōg hâpxop putup, xix hâpxop nû'xok, nûy yây

xexkânã!. Yã! xohix te Topa hã! puknõg xop yõg hãpxopmã'ax, 'ap pexkox yõg'ah. 17Ha hãm xexka nõg putup, xi! yõg hãpxopmã'ax xohix nõg putup, pa tikmũ'ün te Topa pu hãpxopmã max, xix nõm pu! yĩpkox pi!, puxix tu hi xe'e kux 'ohnãg.

Tikmũ'ün te Kunnix hã! puknõg

18'Ûgkutok xop: Hãmyãxatamuk xohix xox putox te mõi'nãp-tup. Tikmũ'ün te xa hãm'ãktux, ha hãm'ãpak, yã tik gãy xexka nũn, tu Kunnix tu! gãy, ha hõnhã tik gãy xop punethok, nõm te Kunnix tu! gãy, ha taxĩy yũmũ'ãte! yũmmũg: Yã hãmyãxatamuk xohix xox putox. 19Nõm Kunnix tu! gãy xop te yũmũ'ã nĩm, 'ũpuknõg tu!, 'ũkuxa mãm xet tu!. Pax pu yũmũ yõg, puxix yã tu pip ka'ok. Pa! mõi, nũy mõi 'ũxohix pu! mõi, yã yũmũ'ã hã! puknõg.

20Kunnix te Topa Koxuk nũ'kutnãhã 'ãxop hah, ha 'ãha yĩxoho!, tu xa hãpxe'e yũmmũgãhã!. 21'Ãte xa kax'ãmi!, 'ãxop te hãmyũmmũg hah, yã! koit'ax te hãpxe'e hã! puknõg, tu yãy putuk 'ohnãg.

22'Û 'ũm te! koit? Tute! koit, nõm te: “Yeyox mũn 'ap Kunnix'ah, Topa te Yeyox yãykutnã 'ohnãg,” kaxĩy. 'Õhõm Yeyox tu! gãy, tu Topa yã Yeyox hã! Tak 'ãktux hok, tu Yeyox yã Topa hãk-tok 'ãktux hok, tute! koit tu hãm'ãktux. 23Tikmũ'ün te Topak-tok 'ãktux hok, puxix kamah 'Ãtak 'ãktux hok, ha tikmũ'ün te Topak-tok putup, puxix tu! Tak putup kamah.

24Yĩy hãm'ãktux'ax hittap xeh 'ãkuxa kopah, nũy 'ãhi xe'ẽgnãg Topa yũmũg Tak mũtik, xik-tok mũtik, tu! kuxap-xet Topa kuxa mũtik, xik-tok kuxa mũtik. 25Yã Kunnix mũn te yũmũ'ã hãm'ãktux xex, tu yũmũg xohix hĩnnãp-tup xe'ẽgnãg, 'ũg pip Topa yĩkãgnãg pexkox tu!.

26'Ãte xa kax'ãmi!, puyĩy tikmũ'ün xa mõi'ãmã hok. 27Kunnix te Topa Koxuk yĩxõnnãhã 'ãxop hah, ha tikmũ'ün 'ũm te xa hãmyũmmũgã hok. Yã Topa Koxuk mũn te 'ãkopa! xip, tu xa hãmyũmmũgãhã!, tu Topa yõg hãm'ãktux xohix yũmmũgãhã!, tu xa hãpxe'e yũmmũgãhã!, yĩy hãmyũmmũgã'ax pu 'ĩpkox pi!, nũy Kunnix kuxa mũtik 'ãkuxap-xet.

28'Ûgkutok xop: Ya hamũn. Kunnix kuxa mũtik 'ãkuxap-xet, hu ta kuxãnõg hok, 'Ihã Kunnix te putpu! nũn, yĩy yãyhãhup hok, 'ap yãy 'ũm xaptop putup'ah. 29Kunnix te hãmyok mĩy, yĩy yãy yõg tikmũ'ün te hãmyok mĩy kamah, yã Topap-tok xop nõ'õm. Yã! max 'ãxop te hãmyũmmũg.

Tu Topak-tok xop 'ãktux

3 1Topa te mõi yũmũg yãy xe'ẽgnãg, tu mõi yãy xe'ẽgnãg, hu yũmũg 'ãxet'ax mĩy Topak-tok xop. Yã Topa hã yũmũ'ã kutok xop xe'e!. Topa hã! puknõg xop te yũmũg putup nõg, Topa mũn yũmmũg 'ohnãg tu!. 2'Ûkxape xop: Hõnhã Topa hã yumũg kutok xop, ha yũmũg xuxyã nũn, kopxix yũmũg yãy yãnãn 'ũtup'ax, ha xĩy 'a yũmũ'ãtep yũmmũg'ah, pa Kunnix nũn, kopxix yũmũg yãy yãnãn, nũy Kunnix putuk, yũmũg xuxyã xe'e pẽnãp-tup tu!. 3Ha tikmũ'ün te Kunnix nũn'ax hip, tu! xak, nũy hãpxopmã max, nũy Kunnix yõg hãpxopmã max tat.

⁴Tikmũ'ün te Topa yõg xat'ax pu' yĩpkox hok, puxix tu hãpkummuk mĩy. Yã hãpkummuk mĩy, 'ihã' xat'ax tu yĩpkox 'ohnãg. ⁵Kunnix nũn, nũy yũmũ yõg hãpkummuk mĩy'ax kuxyã', tu hãpkummuk mĩy 'ohnãg. Yã 'ãxop te' yũmmũg tap, ⁶yĩy tikmũ'ün kuxap-xet Kunnix kuxa mütik, puxix tu hãpxopmã max, tu 'a hãpkummuk mĩy pax'ah. Pa tikmũ'un te hãpxopmã kummuk pax, puxix Kunnix pẽnã hok, xi' yũmmũg hok kamah.

⁷Ûgkutok xop: 'Õg pa 'ãti', puyiy tikmũ'ün xa mõ'ãmã hok. Tikmũ'ün max te hãmyok mĩy, ha kaxiy Kunnix te hãmyok mĩy. ⁸Tikmũ'ün te hãpxopmã kummuk pax, puxix Hãmgãyãgnãg yõg, yã Hãmgãyãgnãg te hãpxopmã kummuk tap. Topa te hãm xexka mĩy, 'ihã Hãmgãyãgnãg te hãpkummuk mĩy tap. Ha Kunnix nũn, nũy Hãmgãyãgnãg yõg hãpxopmã'ax nõã', pu tu nõg.

⁹Topa Koxuk te Topak-tok xop ka'ogãhã', puyiy hãpxopmã kummuk hok, Topak-tok xop tu'. ¹⁰Topak-tok xop xix Hãmgãyãgnãg kutok xop 'ap yãy putuk'ah. Yã Hãmgãyãgnãg kutok xop te hãpkohe mĩy, tu' nõy putup hok.

Tu yãy putup pax 'ãktux

¹¹Ãxop te hãm'ãktux hittap 'ãpak, hu: “Ûyã yũmũg xohix yã yãy putup pax.” Kaxiy. ¹²Tik hittap Kãyiy te yãy taknõy 'Ameo putex. 'Ãnõy putex hok, nũy Kãyiy putuk hãpxopmã hok. Ha Hãmgãyãgnãg xop yõg, tu yãy taknõy putex. Tep tu Kãyiy tep-tex? Yãy kũmĩy'ax kummuk tup-tex, 'ütaknõy te hãpxopmã max, yiy Kãyiy tep-tex.

¹³Ûkxape xop: Topa hã' puknõg xop te 'ãp-tup nõg, pãyã 'ãkuxãnõg hok. ¹⁴Hõmã yũmũ'ãte hãpxopmã kummuk pax, pãyã Kunnix te yũmũg kuxa hĩnnãhã', yiy yũmũg nõy putup pax xexka nõmhã. Yã taxiy hã yũmũg yãy kuxa hi'ax yũmmũg. Tikmũ'ün te' nõy putup hok, puxi' kuxa hi 'ohnãg. ¹⁵Tikmũ'ün te' xapep-tup hok, puxix tu kuxa kopap-tex, ha tikmũ'ün tep-tex, puxix tu kuxa hi 'ohnãg. ¹⁶Ha yũmũ'ãte putup pax yũmmũg. Yã Kunnix xok yũmũg pupi!, nõ yũmũg yãy xe'ẽgnãg, tu yũmũ'ã tu' xok, 'üyã yũmũg xape pupi xakix kamah! ¹⁷Ûptexop xexka te' nõy hok 'ũm pẽnãhã', tu hãpxop 'ũm hõm hok, 'ükuxa ka tu', puxip-texop te Topa 'ũm putup pax 'ohnãg. ¹⁸'ũgkutok xop: 'Ãxop te 'ãnõy putup, ha hãpxopmã max, nũy 'ãyiy'ax hãp-tup puxet hok. Pa hãpxopmã max, nũy 'ãnõy hã 'ãtehet, nũy tup-tup pax xe'e'.

Tu kuxãnõg hok Topa keppa 'ãktux

¹⁹Hã kaxiy yũmũ'ãte hãmyũmmũg, yãy yõg hãpxopmã'ax max hã yũmũ'ãte hãmyũmmũg. Yã yũmũg mũn Topa yõg, hu yũmũg kuxa mãm ka'ok Topa kopah. ²⁰Yũmũ'ãte yãy kuxa yĩkopit, tu yã yãy kupex, puxix Topa hãmyũmmũg, nũy yũmũg kuxa tu yũmmũg kamah. ²¹Yũmũg kuxa yã yãy kupex hok, kopxix yũmũg mõg yãy nĩynãm, nũy Topa keppa' pi!, nũy nõm pu hãm'ãktux, nũy yũmũg kuxãnõg hok. ²²Topa pu yũmũg yĩpkox pip, yiy ta yũmũg xat, 'ũ hãpxopmã max, hu Topa tu' xak, 'ũ yũmũ'ã hãpxop 'ũm popmã', ha' popmãhã'. ²³Ha Topa te' xat, hu: “Ãkuxa mãm 'ũgkutok Yeyox Kunnix kopah,” kaxiy. Tũ

xe: “'Āpu 'āxohix yāy putup pax,” kaxīy. Yā kaxīy Kunnix te yūmū'ā xat tap. ²⁴Tikmū'ūn yīpkox pi', puxix tu kuxap-xet Topa kuxa mūtik, xix Topa kuxa nōm mūtik kuxap-xet, tu yāy Koxuk yīxonnāhā', pu yūmū'ā hāmyūmmūgā'.

Tu' Koxuk xe'e 'āktux, xi' koxuk te mō'āmā'ax 'āktux

4 ¹Tikmū'ūn punethok te: “Topa Koxuk tek kopak xip,” kaxīy. Nāy, 'āpu nōm xop yīkopit, nūy hāmyū mmūg. Pe yā Topa Koxuk xe'e te nōm kopa' xip. Yā tikmū'ūn punethok te hām'āktux max, pa Topa pupi hām'āktux'ah. Yā mō'āmā'! ²Hā kaxīy 'āxop te' kopit'ax, hu: Tikmū'ūn te Yeyox Kunnix 'āktux, tu Yeyox yā tikmū'ūn kutok 'āktux, puxix Topa Koxuk xip nōm xop kopah. ³Pa nōm tikmū'ūn te hām'āktux hok, tu: “'A tikmū'ūn kutok xe'e'ah,” kaxīy, puxix Topa Koxuk 'ūkopa tu xip 'ohnāg. 'Āmhok. Pa' koxuk puknōg te' kopa' xip, nōm te Yeyox tu' gāy. Hōmā tikmū'ūn te' koxuk puknōg nūn'ax 'āktux, ha hōnhā hām xexka tu' xip. ⁴Ūgkutok xop: Yā 'āxop Topa yōg, hu hām'āktux hā mō'āmā'ax xop kuxyāp-tup. Yā Topa Koxuk te 'ākopa' xip, tu' ka'ok xe'ēgnāg, ha' koxuk puknōg pu'uk. ⁵Topa hā' puknōg xop te yāy yōg hāpxopmā'ax 'āktux, ha yāy yōg xape xop te hām'āpak, tu Topa hā' puknōg xop hā' xape, hu hām'āpak. ⁶Pāyā yūmūg mūn Topa yōg. Tikmū'ūn te Topa yūmmūg, puxix yūmū yōg hām'āktux 'āpax, ha tikmū'ūn te Topa yūmmūg hok, puxix hām'āpak hok. Ha kaxīy yūmū'āte Topa Koxuk yūmmūg, xi' koxuk te mō'āmā'ax yūmmūg kamah.

Topa te tikmū'ūn mō'yāy xe'ēgnāg 'āktux

⁷Ūkxape xop: 'Ūyā yūmūg yāy putup pax, yā Topa te yūmūg ka'ogāhā', 'ū xape putup pax. Tikmū'ūn te' xape putup pax, puxix yā Topak-tok, tu Topa yūmmūg. ⁸Tikmū'ūn tep-tup pax hok, puxix Topa yūmmūg hok, yā Topa te mō'yāy xe'ēgnāg. ⁹Tu yūmūg yūmmūgāhā', tu tak-tok puxehnāg nū'kutnāhā', tuk-tok puxehnāg nū'kutnāhā hām xexka tu', pu yūmūg pupi tu' xok, nūy yūmūg kuxa hīnnā xe'ēgnāg. ¹⁰Ha Topa te yūmūg mōg yāy xe'ēgnāg. 'A yūmū'āte Topa 'ūm mō'yāy xe'ēgnāg'ah. 'Āmhok. Pa Topa te yūmūg mōg yāy xe'ēgnāg, huk-tok nū'kutnāhā', pu yūmūg pupi tu' xok, hak-tok xok, nūy yūmū yōg hāpkummuk mīy'ax xohix xaxogā', pu tu kux. ¹¹Ūkxape xop: Topa te yūmūg mōg yāy xe'ēgnāg, 'āpu yūmūg kamah yāy putup pax. ¹²'A tikmū'ūn te Topa 'ūm pēnā xet'ah. Yūmūg yāy putup pax, puxix Topa yūmūg kuxa hā yā tu kuxap-xet, ha mōktu yā mō'yāy xe'ēgnāg. ¹³Hā kaxīy yūmūg kuxa mām ka'ok, 'ūyīy kuxap-xet Topa kuxa mūtik. Yā Topa te yūmūg kopa' xip, tu yāy Koxuk xe'ēgnāg yīxonnāhā', yūmū'ā'. ¹⁴Hak mū'āte Topak-tok pēnāhā'. Yā Topa tek-tok nū'kutnāhā hām hah, pu Topa hā' puknōg xop pupi tu' xok. ¹⁵Tikmū'ūn te Yeyox Kunnix yā Topak-tok 'āktux, puxix Topa kuxa nōm mūtik kuxap-xet. ¹⁶Yā yūmū'āte Topa yōg mō'yāy'ax yūmmūg, ha yūmūg mōg yāy xe'ēgnāg, ha yūmūg kuxa mām ka'ok nōm kopah.

Topa mûn mō! yāy'ax xe'ëgnāg, ha tikmû'ûn te' nōy putup pax, puxix tu kuxap-xet Topa kuxa mûtik, ha Topa kuxa te nôm mûtik kuxap-xet 'ûyānān tu! ¹⁷Topa te mōg yāy xe'ëgnāg, tu mōktu yûmûg kuxa kopa' xip ka'ok, ha yûmû'âte mōg yāy nīynām. Ha hāptup xe'e mō'nāp-tup, 'îhā Kunnix xe'e te putpu nûn, nūy hep xop xohix yōg hāpxopmā'ax kopit. 'Ûyā yûmûg hāpxopmā max, Kunnix te hāpxopmā max putuk! ¹⁸Tikmû'ûn te' nōy putup pax, puxix tu! yîpkutuk hok, tup-tup pax, hu' yîpkutuk hok. Tikmû'ûn te' nōy yîpkutuk, puxip-tup kutōgnāg, tu' gāy'ax yîpkutuk, hu' kuxa xūy.

¹⁹Topa te yûmûg mōg yāy xe'ëgnāg hāmāxap, yîk-nāy tu yûmû'âte Topap-tup pax. ²⁰Tikmû'ûn te: "Āte Topap-tup pax," kaxīy, tu' xape 'ûm nōy putup nōg, puxi' koit. Tikmû'ûn te' nōy pēnāhā', tup-tup hok, puxix Topap-tup hok kamah. 'Ap pēnā xet'ah. ²¹Yīy Kunnix te yûmûg xat, hu: "Tikmû'ûn te Topap-tup pax, puxi' xape putup pax kamah," kaxīy.

Tute' gāy xop kuxyā 'āktux

5 ¹Tikmû'ûn kuxa mām ka'ok Yeyox Kunnix kopah, tu yā Topa yōg hāmyāyikutnā'ax yûmmûg, puxix nôm tikmû'ûn Topa hāktok. Tikmû'ûn te' Tak 'ûm putup pax, puxik-tok xop putup pax kamah. ²Yûmû'âte Topap-tup pax, tu 'ōg xat'ax mīy, hu Topak-tok xop putup pax kamah, tu' yûmmûg. ³Tikmû'ûn te Topap-tup pax, tu tu' yîpkox pip, 'ap xat'ax ka'ok'ah, yûmûg mōg yāy xe'ëgnāg hah. ⁴Yā Topak-tok xop te' gāy xop kuxyāp-tup, yûmûg kuxa mām ka'ok, puxix Topa hā' puknōg xop kuxyāp-tup. ⁵Û 'ûm te' kuxyāp-tup? Nôm xop kuxa mām ka'ok Yeyox kopa xop, tute' kuxyāp-tup, nôm te hāmyûmmûg, yā Yeyox mûn Topak-tok.

Tu Yeyox Kunnix 'āktux

⁶Tu' nûn, hap-tox pix kōnāg hā, ha' hep 'āta nû'nāhā'. 'Ûp-tox pix, 'îhā Topa te yāy kutok 'āktux, ha yûmûg pupi' xok, 'ûyīy yûmû'ā Topa hā kutok xop kamah. Ha Topa Koxuk te: "Hamûn! Yā hām'āktux xe'e!" kaxīy. ⁷⁻⁸Yeyox Kunnix yā Topak-tok xe'ëgnāg. Topa Koxuk te yûmûg kuxa kopa hāmyûmmûgāhā', 'ûyīy hāmyûmmûg, xix Yeyox putox pix, 'îhā Topa te hām'āktux, xix Yeyox te yûmûg pupi' xok, nūy yûmûg kuxa kummuk xit, nūy tu kuxa maxnā', yā hāpxopmā'ax 3 hā yûmûg kuxa mām ka'ok Yeyox Kunnix kopah. ⁹Tikmû'ûn te hām'āktux, kopxix yûmûg xupax, ha Topa te hām'āktux, kopxix yûmûg yîpkox pi', hāpxe'e 'āktux hah, ha Topa te Yeyox yā yāy kutok 'āktux. ¹⁰Tikmû'ûn kuxa yûm ka'ok Topak-tok kopah, puxix yāy kuxa tu: "Hamûn!" kaxīy. Tikmû'ûn kuxa yûm hok, puxix tu Topa te yā' koit 'āktux, Topa yōg hām'āktux pu' yîpkox 'ohnāg hah, ha Topa te: "Yeyox mûn yā 'ûgkutok xe'e!" kaxīy. ¹¹Tu xe: "Āte 'ākuxa hinnā xe'ëgnāg, 'ûgkutok hā 'ākuxa hinnāhā, ha 'āhi kux 'ohnāg," kaxīy. ¹²Topak-tok te tikmû'ûn mûtik tihī', puxix tu kuxa hi xe'e, ha tikmû'ûn mûtik ti hok, puxix tu hi 'ohnāg.

Tu' hi xe'ëgnãg, ha' kux 'ohnãg 'ãktux

¹³Ãte xa kax'ãmi', nũy xa hãmyũmmũgã'. 'Ãxop kuxa mãm ka'ok Topak-tok kopah, tu 'ãkuxa hi xe'ëgnãg. ¹⁴Topa keppa yũmũg pip, tu' yĩpkutuk 'ohnãg. tu Topa tu' xak, pu hãpxop 'ũm hõm, 'ũyĩy yũmũg hãpxopmã max, puxix yũmũ'ã' hõm. ¹⁵Yũmũ yõg hãm'ãktux 'ãpak hah, hu yũmũ'ã' hõm putup.

¹⁶Pẽyã tikmũ'ũn te' xape pẽnãhã', ha hãpkummuk mĩy miãx, yĩy Topa te' xũygãp-tup, pãyãp xok putup'ah. 'Ãpu Topa tu' xax, pu 'ãxape hĩnnã', puyĩy tu' xok hok. Yã hãpkummuk miãx. Pẽyã' xape te hãpkummuk xexka mĩy, pũyã Topa tu' xax hok, puyĩ' hĩnnã'. Yã' xok putup. ¹⁷Hãpkummuk mĩy'ax xohix te yãy pu hãpkummugãhã', pa 'ap xohix tep-tex'ah.

¹⁸Topak-tok xop 'ap hãpxopmã kummuk pax'ah, Topak-tok te' pẽnã max hah, yĩy Hãmgãyãgnãg te' kummugã hok, ha yũmũ'ãte' yũmmũg.

¹⁹Yã yumũ' mũn Topa yõg, ha Hãmgãyãgnãg te Topa hã' puknõg xop xat.

²⁰Yã Topak-tok nũn tap, tu yũmũ'ã hãmyũmmũgãhã', 'ũyĩy yũmũg Topa xe'ëgnãg yũmmũg. Topa kuxa mũtik yũmũg kuxap-xet, xik-tok Yeyox Kunnix kuxa mũtik yũmũg kuxap-xet. Yã Topa xe'ëgnãg, tu yũmũg kuxa hĩnnãhã xe'ëgnãg.

²¹Ûgkutok xop: Topa 'ũm komut nĩm! Nõm pu nũ'ãktetex hok! Tu ta tu' kux.